

# Mobilisar la basa per avair success

Partida socialdemocratica grischuna

DA GION NUTEGN STGIER / ANR

■ **La partida socialdemocratica grischuna ps vul impedir la tscherna da Magdalena Martullo-Blocher e la ps svizra vul batter per il sez da cussegliera federala Eveline Widmer-Schlumpf. Ultra da quai vul la ps da noss chantun sunter las elecziuns federalas esser represchentada cun duas personas en il cussegl nazional.** En in rom pli simpel e pli famigliar ha la ps grischuna lantschà ses cumbat electoral venderdi saira a Cuir. Vegnidas a l'occurrèza èn bunamain 100 personas e la pli prominenta da quellas era bain *Christian Levrat*, il president da la ps svizra. El ha ludà la ps grischuna che saja en Svizra ina da las secziuns da la ps cun il pli grond success. In da quels saja bain stada la lutga cunter ils gieus olimpics d'enviern 2022 en il Grischun, ha menziunà *Christian Levrat*. Grazia al grond engas-

chament da la ps haja il suveran grischun chaschuna per il naufragi da quest project gigant. Fitg activs e sin la dretga via sajan ils socialdemocrats dal Grischun dentant er stads tar la votaziun pertutgant l'iniziativa da las abitaziuns secundaras.

## Gudagnar sin custs da la pcd e dals verds-liberals

*Christian Levrat* quinta che la PS vegn a far tar las elecziuns naziunalas almain 20% da las vuschs e quai en ina gronda part dals chantuns. Per l'avègnir saja quai da gronda impurtanza d'avair en il parlament ina gronda fracziun cun star sin maisa impurtantas decisiuns tar l'energia, l'AVS, las cunvegns bilaterals ed er la cumposiziun dal cussegl federal. *Christian Levrat* spera che la ps vegnia a cum-pensar en singuls chantuns la sperdita da sez da la pcd e dals verds-liberals. El saja bain surstà da la colliaziun da glistas da la



Unids cun il president svizzer da la PS èn candidats e candidatas da la ps grischuna per il cussegl nazional. Da sanester *Jon Pult*, *Beatrice Baselgia*, *Hanna Bay*, *Christian Levrat*, *Silva Semadeni* ed *Andreas Thöny*.

FOTOS G. N. STGIER



Das presidents da la ps cun cleras finamiras: Avair success tar las elecziuns naziunalas. Da sen. *Jon Pult*, il president da la ps grischuna e *Christian Levrat*, il president da la ps svizra.

pcd dal Grischun cun la pld, gist quella partida che saja cunter la cussegliera federala *Eveline Widmer-Schlumpf* e quella partida che fetschia adina puspè alianzas cun la pps. En tuts cas vegnia la ps a sustegnair la reelecziun da l'actuala ministra da finanzas.

## Impedir in segund sez da la pps

La finamira da la champagna electorala da la ps grischuna per las elecziuns saja da vegnir tar in segund sez en il cussegl nazional, ha ditg il president chantunal *Jon*

*Pult*. Perquai haja la PS fatg la colliaziun da glista cun ils verds-liberals per cotras avair ina pitschna, però insumma ina pussaivladad da cuntanscher quella finamira. Almain usche impurtant saja da garantir che la pps, il pli grond adversari politic da la ps, na fetschia betg in segund sez e che *Magdalena Martullo-Blocher* na vegnia betg elegida. Per cuntanscher quella finamira haja la PS da far in cumbat electoral cun grond engaschament, mobilisar la basa per far in resultat excellent. Cun eventualmain perder ils verds-

liberals intginas vuschs haja la ps bunas vistas da vegnir tar in segund post a Berna. La colliaziun da glistas da pcd, pld e pbd fetschia en naging cas pli simpla la finamira da gudagnar in ulteriur sez, accentuescha *Jon Pult*. La ps cun *Silva Semadeni* e la verd-liberala cun *Josias Gasser* hajan l'avantatg dad ir en la cursa cun duas personas che sajan gia a Berna e che sajan enconuscentas. La pld e la pbd n'hajan betg il bonus dad ir en il cumbat cun candidats existents da quai che la ps avess da profiter.